

王壯武公珍

王公珍字璞山湘鄉人也幼至孝母手生疽公吮之既敷藥血出如箭公號泣籲天乞身代數日瘡人以爲孝感云二十四爲諸生從羅忠節澤南游忠節深器之咸豐二年粵寇入湖南境公上書知縣朱公孫詒請練民兵討賊朱公壯之令與羅忠節募鄉勇千人教練羅忠節將中營公將左營羅君信南將右營屯縣北馬坵埔防縣城其冬調入省垣會曾文正公奉命治團練公益與文正講求仿前明戚繼光之法練習膽技號曰湘勇明年春巡撫駱公秉章命擊衡山土寇追及安仁滅之五月擊桂東賊至龍泉大破之秋廣東賊自樂昌陷與甯公簡死士百人疾馳三晝夜未明薄城慶戰擒斬殆盡復其城是時積功已擢直隸州知州賞戴藍翎會賊攻江西湖南援師失利死事者多公親舊公憤甚謁文正請增軍殄賊文正許之欲練萬人爲恢復中原計又以湖北急議令公援文正與書云足下義氣薄雲霄忠肝貫金石望率湘勇三千卽日渡湖而北與岷樵石樵之師相合保鄂城固全局不特湖南受其利天下實有賴焉其倚重如此後鄂中解嚴不果行而公負奇氣語天下事甚易文正患之乃稍裁汰公所募勇於是公與文正議論不合文正東下公留防湖南由是公統二千四百人別爲一軍四年二月賊自武昌上犯入岳州湘陰靖港分黨陷甯鄉公敗賊靖港適儲公攻躬亦敗賊甯鄉賊下竄文正率水陸軍抵岳州三月公獨進剿崇陽通城師抵羊樓司驟與賊遇前鋒失利退守岳州文正所遣將鄒壽璋屯城中謂公曰城空無食不可守也公弗從明日寇至戰不勝壽璋退保南津文正遣戰船迎師公趨城出城遂陷共出者九百餘人營官鍾近衛鍾近瀛劉恪臣等皆歿公與友書曰岳州之役喪我良友義士畢生大憾雖殲天下之賊未足消憤而抵罪後公每戰氣益厲心益憤以少擊衆百戰而無一挫遂稱名將號無敵其發憤基於此也是年坐輕進失利奪職四月文正水陸軍大破賊於湘潭賊分黨由甯鄉開道遜公在馬坵埔截擊追至通湖橋賊皆落水死旣而略公令帥勇五百人防都

州討平嘉禾藍山土寇會廣西賊萬餘人嘯聚桂林地接江華之領東巡撫檄公赴江華與守備周公雲耀協防閏月賊犯江藍廳之錦田擊走之九月恭城賊竄永明之桃川灌陽賊圍道州州牧馮公崑禦之糧且盡公及周公簡三百人赴援戰竟日賊敗遂公策賊必乘虛襲江華與周公晝夜馳百四十里先入城賊至迎擊大破之進搗桃川出龍虎關破恭城賊于栗木街回擊甯遠藍山圍城賊聞悉解而江華永明賊復大至公回駐通州公兄勳率五百人來會復破賊龍虎關分軍駐錦田領東備粵寇又削平甯遠藍山嘉禾諸醜類南邵略靖公復職 賜戴孔雀翎五年逆渠朱孔英陷富川江華永明大震公及周公往援屢創賊會僞鎮南王胡有祿自連州入楚境與朱逆合攻永明公與周公協剿設伏敗之功最擢知府賊遂出龍虎關陷灌陽尋繇全州陷東安公與周公進攻東安城血戰四閱月拔之賊竄全州亡何胡有祿掠東安祁陽界公敗諸桐子山越日擒有祿餘黨踞四明山又追殲之 詔以守巡道用別賊何祿自宜章陷郴桂及永興分黨陷茶陵將繇耒陽犯衡州巡撫檄公守衡命公兄勳增募千人公以五百人駐耒陽自帥千人攻桂陽再戰復之餘賊併踞郴城凡數十戰乃復逐者尙萬人公會鄉團追剿十二月五日戰黃洲堡追至兩廬墟賊方食軍午至奪其食而殲之先是朱洪英寇新甯爲邑人劉公長佑所敗竄永州界周公雲耀連敗之及回興與糾黨來攻永明知縣逃周公力戰死城遂陷方公之攻郴也逆渠蕭元發率賊七千有奇攻桂陽爲鄉兵所敗竄入甯遠九疑山參將趙公永年追擊遇害遂陷江華與永明賊相犄角公進戰復永明六年正月復江華窮追至連州境盡殲之朱逆跳走二月戰西岸三月屢捷于陽山賊竄英德之大灣 詔以楚境肅清 賞四品封典常是時軍中瘴疫作死亡相屬公亦積勞思稍假休沐而江西州郡連陷羅公澤南戰沒武昌李公績寶馳書約公綴賊上游公卽投袂起轉戰崇陽通城通山蒲圻界復其城斬逆首張庸忠陳華玉敘功加按察使銜七年春奉 詔援江西公自是屢奏奇捷皆以寡擊衆大小百餘戰殺賊十餘萬人姦民由是懾軍威不復以從寇爲樂而公名遂大振號爲虎云初官軍水陸圍吉安其攻臨江者亦掘長濠因賊逆渠胡壽階何秉權率數萬

賊來援據水東與城賊夾江相望公至沿轅水而南自曲灘濟壁水東東南山上賊鼓譟乘之公方眠大樹下欠伸徐起部署擄鼓登望樓令士卒俯首結壘仰視者斬賊大疑不敢前稍進士仍結壘不輟俄而山後一軍出賊背賊遽退望樓鼓發士投器操戈大呼馳出左右伏兵齊起斬棄樓感其左軍入水餘賊走入水東壁衆請具餐公曰今日不克水東不遑食也遂揮軍擣賊壘都司易普照窺壘孔中槍死衆奮曰當爲易將軍報仇爭入壘殺賊數千壽階遜五月賊自萬安屯藤田將出樂安解吉安之圍公與遇於流坑壽階忿前糾黨數萬自甯都據沙溪出藤田公先擊其左自帥死士百人壽其右賊崩奔再蹴之瑤嶺嶺險狹賊悉墜巖洞腹碎首以死遂擒壽階是役也兩廣凶悍賊俘斬殆盡閏月賊自甯都出數萬人據永豐之韶源冀援吉安公以千二百人轉戰屢敗之追及甯都之釣峯賊爲背水陳旣敗盡沒於水師踐積屍以渡斬僞將軍蕭復勝復破賊於古夏再破新城賊數萬於東山礪斬僞總制張宗相時僞國宗楊宜清楊輔清等憤其衆屢勦糾黨十萬有奇據廣昌之頭陂誓與公決死戰傳令前者却後則刃之公偵知喜曰賊散則難圖聚可一戰殲也乃勒兵大戰公先馳馬陷陳壯士從之呼聲震林樾賊大潰遂北六十餘里斬級萬餘別遣將復樂安公自渡贛九日中大捷十有二士民鼓掌歎咤牛酒相屬於路於是江西兩湖三巡撫皆以狀聞賜愛什蘭巴圖魯會吉安軍敗丐援公密令鄉團張己幟僞爲趨建昌狀而潛返藤田吉安軍氣復振七月賊自宜黃窺樂安圖出永豐解吉甯圍撫州賊亦來會公抵樂安誘賊城下敗之明日再敗之于崇仁太平市又明日大搏於牀頭賊用騎兵數千突陳公誠籐牌軍俛首砍馬足自領精銳橫貫賊陳斬級數千獲馬二百匹俘八百人會病熱返樂安旬餘卒軍民慟哭聲震數十里年三十有三優旨悼惜贈布政使救江西湖南建專祠予諡壯武公負氣好異膽力絕倫自別將不從曾文正於東下無日不討軍寔而申儆之常令士卒足縛鐵瓦習超距以意爲陳法令演之臨陳好以奇勝疾馳掩擊出人意表馭衆嚴而有恩軍暇輒讀孝經四書士卒化之刁斗聲與書聲相續或有申約莫敢仰視赴敵莫敢返顧分行布伍耳聽鼓目視旗疾走而周馳變化分

歧無聲息賊嘗置巨匣地上士各舉而拋之莫敢啓視公以一軍縱橫邊決團勇貪拾賊助者則益爭前助勢左文襄與公書云廣昌之捷早注意中璞山如龍團衆如雲倏隱倏見莫測其妙真絕世奇文也然其得手處仍在節制精明四字公與耆齡中丞書云某雖以孤軍遇極強之寇處至危之地不敢輕求應援非自足而惡人分功也實以冗雜之衆多不如少夢泯之卒有不如無况吾民久困水火安忍使之益熱益深乎公嘗追賊嘉禾道中乏食掘民間山諸各投錢於穴償其值民開爲立生祠自憾用世太早學未充優禮文學士如不及甯遠張老人年百十有八貧甚公造其家人慢之爲其子娶婦比旋師經其地老人已抱孫矣乃以公生日偕老人及賓佐登九疑山張宴作樂爲親壽公以久違子舍語次歎歎老人執爵言曰公慎自愛第患功業弗建爲親昵耳服勞奉養抑末也衆聽其言初相者言公功烈雖高名滿天下然不得過三品故駱文忠左文襄嘗憂之保擢爲之遲回也其後偏裨如張公運蘭王公開化王公文瑞劉公典王公開琳黃公萬友丁公長勝皆爲一時良將而劉公松山尤絕倫軼群用兵嘗守公家法芟夷大難平定回疆豈非公之遺烈哉所著有練勇芻言陳法新編尺一偶存嗣子詩正從左文襄征戰有功官至江蘇候補道卒

評曰曾文正訓諸將曰昔璞山嘗以吾言爲非今諸君盡以吾言爲是亦誤矣蓋壯武才氣無雙有獨是之見則不妨非文正此仲由所以迂仲尼也如壯武者非古所謂豪傑哉

王貞介公開化

王公開化壯武公珍之從弟也年十七從壯武剿平湖南南路粵匪以善戰聞後分帶湘勇剿江西臨江吉安撫建諸賊功最壯武歿與張公運蘭分統其軍左公東征公以道員總理營務連克德興婺源咸豐十年冬剿僞主將黃文金明年春剿僞侍王李世賢夏剿劉官方賊衆復建德剿婺源德興竄匪皆大捷公力爲多抵廣信病卒公厚重沈毅行軍常以寡擊衆雖矢石如雨之中意思安閒不異平常至其摧鋒陷陳颺發電舉責育不足喻其勇也樂平

之戰賊衆如蟻如蠅聯亙十餘里西門一路猶厚僞侍王賊營所在也左公初擬自常西路公常中路別將常東路公忽奮起躍馬馳出西路而密屬劉公興從左公出中路恐左公犯此重險而顧以身當之耳卒之三路皆捷李曾受創遜賊望風披靡江右肅清公在軍八年功績昭著性行淑均咸倚以爲重曾文正公歎曰時事方艱良材條頽可勝痛惜因奏請 賜卹 予諡貞介

王公文瑞字鈴峯壯武公之族叔也咸豐間從壯武公戰湖南江西邊境已有名潯保同知壯武每臨敵先夕會諸將問何以戰諸將各言戰法各手一圖呈壯武壯武以爲然乃定計明日戰不如約者黜故百戰百勝公守此法一如壯武壯武威名賊怖之如虎後公亦號虎云咸豐十年以知府從左公宗棠由江援浙大破賊於浮梁時左公全軍僅八千人公領三千人縱橫盪決策應數百里所向克捷嗣守遂安與道員王開來破僞侍王李世賢僞輔王楊輔清十萬之衆同治二年奉援徽州 詔補授贛南兵備道剿賊休歙胡黃古賴諸賊自石埭竄黟縣公出奇兵二百伏盧村毀石橋斷賊後路明日率師三千與賊戰于城南賊大敗奔至盧村見橋斷二百人起應之賊溺河死者不計其數騷人詫歎以爲神兵公駐祁門保固皖南與劉公典肅清江皖之交以少擊衆兵機迅速如神龍變化莫測是時皖南防軍有總兵朱品隆三千人唐義訓二千人皆老湘營之最精者然非公與劉公典縱橫馳擊則防軍仍單皖南不保大局可虞故沈公葆楨奏江皖戰功不在克復省城下其信然也後浙寇五路犯江西公與席公寶田軍鮑公超軍相犄角大破之江西平巡撫沈公令之贛南道任王總兵開琳接統其衆追賊至閩開來開琳皆壯武公之族人援浙閩有功

張君聲訓後更名聲恆桂陽州人有才畧咸豐六年募鄉兵百人至連州謁王壯武珍願隸戲下壯武令擊賊屯曰勝則留汝君率士謀而往賊開壁與戰敗退至隘口阻山自固兵不得入迺伴退賊追至返戰至隘仍相持壯武陳兵山上若不相知聞君急無可爲計視後面有平田可五六百步指謂衆士令走當稍遠至平田俟賊相尾卽反撲

行與爭隘賊果追至平田百人皆返旆衝賊過其後賊卽退至隘口兵賊相搏壯武從山上吹角擂鼓馳下乘之遂破賊屯乃令君領百人爲新軍薦於巡撫駱公令將五百人隸李輔朝擊宜章莽山賊屯破之已壯武又薦君於胡公林翼防崇陽通山八年左文襄公援浙江求敢戰士夙知君名令爲裨將君已積功至都司憤武官見輕入嘗得府同知屢破賊於嚴杭名與劉公典王公文瑞相頡頏後統三千人擢道員夜 贈太僕寺卿

李忠武公續賓

附孫按察手信
彭里親友贈

丁太常銳義
劉忠壯神山

何太僕忠騷
周懲烈福高

蕭剛而意文
彭武烈志遠

李公續賓字迪庵湖南湘鄉人也沈毅寡言笑身長七尺膂力過人習騎射能挽三石弓羅忠節公講學里中公折節受學依依不去咸豐三年忠節募勇殺賊公奉父命往佐之所練鄉兵號湘勇從平桂東土匪未幾粵賊圍江西行省曾文正公檄忠節往援公佐謝君邦翰將右營邦翰邑諸生故忠節弟子抵江西戰死於是公代領其衆自是忠節將中營公將右營會土匪陷太和安福圍吉安遂同解吉安圍太和安福賊皆敗潰復馳剿永新事平議敘從九品師還假歸甫三日趨衡州剿賊油榨墟進復永興次郴州敘功進縣丞初公所領僅三百六十人至是巡撫駱公秉章命增爲五百人明年駐衡州平常甯土匪時湘潭大捷曾文正公統水陸軍東下檄湘勇從六月抵岳州壁大橋湘軍兩營才千人分防八路賊日夜來犯塔齊布公約攻賊兵始交小却賊追騎大至公左右止數人戒曰毋走徐行陟山岡賊不敢逼已而我軍漸集公親搏戰斬大旂賊數人餘賊爭登山公曰是可取也策馬大呼而進斬賊目一人奪其旂追北十餘里明日塔公至營指所部贊曰好勇好勇與公言良久歎曰名將也公自隨羅忠節從軍循循弟子列退然若無所知人無有異之者至是始以知兵聞時官軍日與賊戰斬馘數千賊連旬不得休掠食且盡公與塔公計曰當乘機進薄賊可破矣明日遂進兵風雨驟至衆欲退公曰天助我也與塔公並轡督戰頃刻破數十壘岳州平擢知縣 賞戴藍翎八月從羅公克崇陽咸甯進規武昌破花園堅壘及鮎魚套賊營遂克武漢籍具羅忠節傳公擢直隸知州 賞花翎十月大戰于田家鎮破之田家鎮者江流盤折逼隘之處其南岸爲半壁

山峭壁斗絕賊以鐵鎖橫江萬舟翔集氣銳甚公手刃怯卒三人十皆殊死戰連破賊壘而水師亦乘機斷鐵鎖焚賊舟好事者至摩厓以誌績當是時公軍僅二千六百人以寡擊衆所向披靡公已名聞天下由是擢知府賞墊勇巴圖魯名號旋授安慶知府初陸師分南北進剿總督楊需剿北岸公隨塔公羅公剿南岸曾文正督水師循江下僞丞相羅大綱守廣濟黃梅設丰壘數十田鎮破後僞燕王秦曰綱檢點陳玉成皆往附之勢張甚總督不能前塔羅兩公乃渡江北剿公率爲軍鋒每攻壘與塔公逼賊壘數十丈席地坐礮彈如雨下談笑自若忽躍起曰進則橫厲無前當者輒碎遂復廣濟黃梅抵湖口敗賊梅家洲知九江未可驟下從羅公移軍盛山十二月水師陷入彭蠡湖外江失利小池口賊勢復張湘軍退回九江公憤甚請于文正自率千餘人以歲除前一日渡江攻小池口僞城塔公亦率二十人偕往因衆寡懸殊戰不克比莫始收隊而塔公獨未返公涕泣不食誓渡江再決死戰明日塔公竟覓舟返無恙時除夕三鼓矣明年二月武昌復陷當賊之從江北上竄也公知北岸官軍不能敵建議分南北兩軍夾江而剿令塔公益募勇三千合潯軍五千專剿南岸別選大將率潯軍三千益募勇五千直趨漢口剿北岸南北各自爲戰一圖安慶一圖金陵庶大局克有濟文正聽其言將以北岸屬羅公以餉絀不果無何文正入江西饒廣告急檄湘軍援饒師抵章門則饒匪已陷弋陽三月從羅公進剿敗賊大水橋復弋陽賊走廣信追擊之三日城復移軍景德鎮東路甫定遂建西援武昌之議從羅公大捷于義甯下崇陽畧通城蹴羊樓峒擣蒲圻撥咸甯次第戍定詔以道員加鹽運使銜十一月次武昌巡撫胡公林翼聞公至大喜事無鉅細惟羅公與公言是聽羅公挈持大綱其戰守機宜胥公主之師壁洪山分壁小軍山連破塘角賊壘六年二月與劉公騰鴻扼塞潯斬賊數千屢戰皆捷忽羅公中砲亡當是時軍中新失大帥人情洶洶賊乘機築壘保安門外子及五里墩大營巡撫胡公奏以公撫督諸軍公涕泣受命遂掃平保安門賊壘而江西瑞撫臨建等郡賊蔓延北及崇通蒲咸西及瑞昌皆陷賊乃分湘勇四千屬曾公國華劉公騰鴻等由咸甯進剿賊謂知之屢出城來犯公敗之賽湖堤又敗之小軍山雙

鳳山秋七月僞翼王石達開率援賊大至戰賊將應之公分兵駐魯家港防援賊遣壯士數百人執所奪黃旗誘城賊賊信爲援至出城夾擊伏起殲賊過半及援賊既至禦之魯家港鏖戰三日城賊鑑前失疑懼不敢出援賊遂敗追奔至小軍山斬首八百別將與城賊鏖門賽湖隄公率師援之賊望見旂幟奔入城自是堅閉不出公募民夫開濠掘江水入湖爲長圍斷賊接濟賊益困十一月丙子武昌復詔以按察使用尋分兵追剿克武昌縣渡江克黃州又渡江克大冶興國遂直擣九江林啓榮者賊中最悍酋也往歲塔公圍攻時堅守弗下至是仍率衆死守夜無更柝望火城以內人聲寂然官軍潛薄之槍砲應聲下七年正月公用攻武昌法闕濠困之賊出城阻截閱數月濠始成四月皖賊上犯號十萬犯蕪州黃梅羅田公分兵援剿又築壘于廣濟童司牌公渡江剿平之八月破小池口僞城仍回九江先是四年賊奪江西戰艦沈塞湖口築壘石鍾山爲浮梁鐵鎖阻官軍隔岸梅家洲壘僞城環巨砲我軍仰攻不利其年十二月水師陷入內湖文正益治水軍章門檄彭公玉麟統之水軍復振至是袁吉瑞臨以次皆復衆議會剿九江公謂九江賊恃湖口相犄角不拔湖口九江不可得也乃定計水陸夾攻湖口九月公遣其弟續宜率馬步軍攻梅家洲僞城躬率師北渡江揚言攻宿松其夜更南渡伏兵湖口北山是時外江南湖水師阻于一江楊公載福彭公玉麟密期會攻梅家洲賊方依岸發砲拒水師聞山後鼓角旌旂蔽山下則大潰公夜半射火城中賊大亂空城走洲上賊亦走要擊盡斬之乘勝復彭澤夷小姑汛僞城得旨除浙江布政使返九江適臨江逸賊竄興國冒雪遣兵往援擊走之八年春水陸晝夜攻九江賊被圍久以數千人嬰城種麥以爲食糧不絕其守益暇我軍穴城崩爲磚石所壅至稍遲賊旋堵禦公令壯士數百人擁盾自蔽先夕伏城濠四月壬子地雷復發壯士自濠內奮呼登城城立復殄賊數萬無脫者啓榮死亂軍中礮其屍九江平論功第一加巡撫銜賞穿黃馬褂許專摺奏事公每建一功晉一秩數省官民歡忭稱道若寵榮之在躬或歌誦戰狀以爲樂傳播中外浙人任京朝者疏請敕公東兵以救浙難而胡文忠以皖中糜爛請留公軍圖皖而固鄂天子許之公乃整旅入皖踰月

連下潛山太湖桐城舒城四縣時賊新破江北軍陷六合渡江陷溧水定遠軍日夕待援 朝廷憂皇專恃公軍或
議曰今久行軍疲屢勝則驕克城留屯不足以爲聲援不留軍則後路空虛且阻塞必敗之道也宜還桐城合都軍
攻安慶則水陸馬步相奇名將精卒咸萃于百里之內功必可成公以受 恩深名重恥退且念攻城非旬日期欲
出奇壁廬州陷寇瑕遂不用其計而發書湖北請益師時胡文忠已持喪還葬官文公得書笑曰李九所向無前今
軍威已振何攻之不克豈少我哉徧示司道皆以公用兵如神無所用援公雖請援亦不留軍示怯懦則進三河二
河距廬州五十里寇築大城環以九壘十月甲辰公悉兵十三營先攻九壘大戰皆破平之俘斬七千官軍傷亡過
千人衆懼乃增調後軍未至賊酋陳玉成連江浦文合廬江衆又糾捻匪招賴壽光州羣盜合十餘萬人日夜奔赴
聲勢洶洶公遣輕兵迎擊于樊渡不利賊益進軍半潰辛亥合圍官軍三十重連營數十里將士狂勝開敗先自亂
公自搏戰不能進還閉壘門七營已先陷寇來如牆公歎曰今敗矣令軍中曰見月照地而走軍皆束載而待月出
公終恥于潰圍謀復固守軍已動遂大奔公馳督戰軍不復成列遂陷陳死咸豐八年十月十日也同知曾君國華
知府何君忠駿知州王君揆一同知董君容方知縣楊君德聞從九品李君續宜張君溥萬皆殉焉道員孫君守信
丁君銳義死守中右營又三日而敗又六日而桐城守兵亦敗前後死者殆六千人事聞 文宗震悼手詔曰詳覽
奏牘不覺隕涕惜我良將不克令終尙冀忠靈不昧再生中甫以佐予也追 贈總督湖北江西安徽湖南立祠
予諡忠武 賞騎都尉世職公父登勝給一品封典子光久光令 賞舉人 穆宗卽位遣官賜祭三年克復金陵
推恩有功之臣 賞二等輕車都尉世職併爲男爵公臨陳安閒靜鎮談笑指揮三軍幅巾緩帶如與客燕見之
儀選士以知恥奮勇樸誠爲上常以寡擊衆出奇制勝凡大小六百餘戰克復四十餘城在軍號令嚴明所過百姓
懼迎耕市不變轉戰江鄂時不索州縣供張廣坐中言不輕發他將多以氣節相高公默然深藏恆曰事由心定毋
張皇性至孝克九江後乞假省親既不果乃爲迎養計其父以書報之曰軍事方殷兒當壹意報 國勿以我二人

爲念公省書掩涕及拔行握胡公手痛曰吾無由復見父母也左右皆感泣軍中所餘廉奉不以寄家嘗資助晉文
正江西營彭公玉麟水師營曾公國荃吉安營李君元度貴溪營約三萬金與諸帥共事和衷商權胡公撥撫標兵
萬人隸公旗下皆心服樂爲之用其臨陳專以救敗爲務顧大局爲先遇賊則讓人禦其弱者而已當其悍者分軍
則以強者予人而留弱者以自隸江楚兩軍每言肯接帶弱兵臨陳救人者塔忠武後一人而已公薨年四十一舒
城難民覓其遺骸送霍山大營母弟續宜親殮其屍續宜官至安徽巡撫自有傳

孫君守信字小石長沙人少讀書不遇遂走京師供事內閣敘勞得從九品試用湖北工楷書總督留繕摺奏道光
二十年李沅發反新甯君隨大軍進剿事平擢知縣咸豐二年粵賊犯長沙君以解餉入城協守有功後從江忠烈
平巴陵土匪晏仲武擢同知 賞戴藍翎尋署蒲圻縣事有惠政五年武昌再陷從羅忠節自江西援鄂壁洪山援
賊古隆賢悉銳來犯君與鄒君漢章蔣君益澧等迎擊破賊于豹子海追奔至樊口又敗之十一月武昌復晉知府
換花翎尋復大治興國武昌諸州縣擢道員羅忠節旣亡君久從李忠武公續賓七年忠武圍九江援賊自臨江竄
興國君與周副將寬世帥師擊敗之其明年與趙副將克彰敗賊麻城從忠武大軍征皖連克潛山太湖桐城舒城
四縣十月師次三河鎮會援賊大至我軍困重圍忠武戰死君與丁君銳義堅守營壘鏖戰四晝夜鉛藥水米均盡
壘破並死之 詔砥按察使陳亡例議卹 賜祭葬 贈太常寺卿 賞騎都尉世職附祀李忠武專祠

丁君銳義字籃村亦長沙人父敷忠世父敘忠叔父取忠並以學行重於時君性豁達習兵家言粵賊犯城集里中
子弟響守禦鄉人恃以無恐咸豐四年胡文忠方爲貴東道耳君名檄募壯士百人同赴鄂旋益募至五千人曰義
字營累功擢縣丞六年羅忠節攻武昌而亡賊渠古隆賢率黨萬餘犯官軍後路屯豹子海時以新失大帥諸將皆
不欲戰君慨言曰我軍頓城下六月賊堅守不出今幸援賊來求我戰願假精兵四千出賊不意可一鼓破也文
忠壯其言夜漏三下檄君與唐君訓方蔣君益澧孫君守信等銜枚掩擊大破之斬首千餘級追敗賊至新店隆賢

僅以身免遂自洪山進屯華容埠當是時賊衆水陸屯聚拒我師君等先自上漲攻之會楊公岳斌水師亦至賊敗潰遂復武昌縣賊退走黃州乘勝進軍壁黃州城外賊夜襲營衆亂君率所部擊敗之會大水諸將議回軍君爭之曰夫兵勢宜遠料敵有方援賊之能已可見矣我屯黃州則百里義民有所歸心賊之上犯有所牽制後路大營相爲聲援且能戰不在近能守不在遠今若旋師賊必踵我踵我必戰戰此可乎諸將皆以縣軍爲憂君乃獨上書陳兵勢胡文忠壯其議終以衆論檄軍還君自請屯青山斷賊餉道十一月武漢復擢知縣加運同銜八年春大破賊于黃泥坂五月與唐君訓方破賊于界牌復先後夷賊壘數十擢同知晉鹽運司運同其秋李忠武征皖檄君從君以大父喪乞假不許遂同破石簪賊壘連克潛山太湖桐城進攻三河鎮君以三河爲廬賊必爭之地請先攻廬江廬江下則與將軍都公提督鮑公二軍合攻廬江然後水陸並進舒城三河廬州皆可計日破而忠武銳意攻廬州九月舒城下十月二日破三河賊壘君再從弟藍翎把總曙擄死之君以連日血戰精銳多夷傷請退屯桐城濟師再進忠武不可已而援賊大至餉道斷軍竟日不得食遂敗忠武死綏君所領義中營已陷突陳入忠武大營集餘衆誓同死寇環攻三日夜水火俱盡營破死之年三十有八 詔贈鹽運使 予祭葬 賞騎都尉世職 加贈太常寺卿 勅本籍建專祠君寡言笑耳重聽衆號丁壘而膽勇絕倫嘗以孤軍遇衆賊手大旂左右揮賊疑有伏左右顧大呼乘之大奔性廉所得奉賞悉分其部曲家無餘財駐軍太湖之日招流亡勸耕種歲大饑煮糜粥以振全活甚衆卒後太湖士民懷君德醵金立祠陳德園春秋祀之

何君忠駿字龍臣平江人生有異稟五歲大父口授詩書易皆成誦十四入邑庠道光二十一年崇陽亂民鍾人燕犯平界君治鄉兵却之敘六品銜充己酉優貢咸豐二年舉順天鄉試三年粵西賊蔓延江南君歸自京師則益治鄉兵爲捍禦計時曾文正督師長沙檄君與李原澍赴軍前君以桑梓有急辭四年正月賊踞岳州欲自平江襲省曾曾公檄平江知縣林君源恩練兵守北界以君及原澍參軍事旋檄塔齊布公胡公林翼濟師援平連破賊通城

平界得完胡公尤器君待以國士黔勇與楚勇鬥死者數人君力排其間砲彈入左臂創甚得不死既而塔胡皆別
剿君獨任防務戰屢捷進克通城論功擢知縣加五品銜明年武昌復陷崇通爲賊蔽九月羅忠節公自江西援鄂
君及原濬各將千人再克通城僞翼王石達開由鄂入江羅軍挫于蒲圻通城之師亦潰原濬死之君退守北界賊
不敢逼後入胡公幕擢同知直隸州八年四月安慶賊上犯陷麻城君率平江勇千人救之未至黃安繼陷被劫無
何麻黃復還冠服君厭戎事遂散遣所部歸會李忠武進攻廬州公辟君掌書記君固辭胡公趣君行李公入皖連
克潛山太湖桐城舒城四縣君以爲常勝之家難與料敵與曾君國華憂之竟及三河之難李公顧諸從事曰苟得
出無俱死君曰公不負國某等肯負公邪時親卒數人侍以銀數餅畀之且曰若歸告吾父母知吾死此足矣卒脫
歸者二人夜三鼓君駢馬隨李公出衝賊陳死之事聞 詔贈太僕寺卿予世蔭子十歲胡公卹以千金爲經紀其
家同時戰沒者尙有蕭公意文彭公友勝劉公神山周公福高彭公志德

蕭公意文字章甫湘鄉人隸羅忠節公戲下以斬級功敘外委咸豐五年從克義甯州擢把總 賞戴藍翎是年冬
再錄從征崇通蒲圻攻晉千總湘軍攻武昌公數陷陳敘功遷守備武昌克晉都司七年從剿蕪黃賊巢攻拔小池
口僞城克湖口縣破走梅家洲賊擢游擊加參將銜八年克九江以參將卽補 賞換花翎李忠武進征皖北從克
潛山太湖舒城桐城四縣遂進攻三河鎮三河鎮者舒廬適中地賊立僞城待糗糧軍火以濟廬州及江甯賊營者
也別築九壘以衛之堅甚忠武銳意取之十月二日分三路進攻公攻河南街老鼠夾賊壘冒砲石先進各軍繼之
縱火焚其壘賊大亂九壘皆下壘中賊盡殲無脫者我軍亦傷亡千餘人公受砲創歸營卒 詔贈副將 予諡剛

勇

彭公友勝字雲臺長沙人初爲長沙協戰兵從征耒陽新甯粵寇起從征廣西以偵探功 賞六品服賊犯長沙隨
糧威壯人城協守尋從江忠烈援江西並有功江西圍解乃歸伍居頃之寇戰繼于大營留爲水師營將賊擾漢黃

公駐師沌口平賊壘二斬僞丞相一武漢既克隨官軍攻九江敗賊于童司簿時已游擢游擊換花翎矣八年九江克復晉參將尋帥所部征皖及賊戰于三河鎮力竭死之公饒膽略水陸戰必衝鋒軍中服其勇死事前夕忠武命公爲前鋒時九壘雖破援賊復大至衆十餘萬距三河三十里我軍僅五千人又多苦戰受創公上言宜堅守不可戰忠武笑曰若驍將今乃怯邪公默然詰旦領所部大呼陷陳賊披靡會大霧觀面不相見不覺逼賊壘援賊四合遂遇害 詔贈副將 予諡果毅

劉公神山字佑甫湘鄉人咸豐初隸羅忠節湘右營從克武漢敘藍翎外委五年克義甯晉千總援湖北復通崇蒲咸進攻武昌大小七十戰公皆與遷守備武昌既克轉戰至黃州進都司七年從攻湖口破賊梅家洲擢遊擊 賞換花翎八年九江復再回援湖北有功遷參將湘軍征皖連克潛太舒桐公功最 詔以副將用三河之戰公首陷陳斬首數人進攻賊壘見害年二十二 詔贈總兵 予諡忠壯

周公福高字子祥湘鄉人從羅忠節援剿江鄂累功擢守備 賞戴藍翎李忠武接統湘軍晉公都司以小池口梅家洲諸戰尤用命 詔以游擊於軍中候補咸豐八年十月戰死三河鎮我軍之抵三河也援賊麇至諸將不欲戰知戰必敗相覩無人色公憤然曰敗則死耳吾輩畏死不來矣旣至此敢惜死以贖壯志乎力戰而歿 詔贈副將

予諡愍烈

彭公志德字道一湘鄉人隸湘軍以功敘把總咸豐六年軍次洪山攻武昌各營裹創喋血鏖戰五閱月不解鞍胡文忠遴敢死士數十人彙奏請獎公與焉遂晉千總 賞藍翎武昌復以守備用七年剿黃州克湖口平小池口堅壘梅家洲僞城公功皆最擢都司換花翎尋破彭澤宿松太湖諸縣每戰必爲前驅不肯後人敘功遷游擊又以復麻城黃安功除參將加副將銜三河之役忠武殉節諸營皆潰公率所部貫賊陳突出死者過半公亦受重創走入中左營與副將李存漢等竭力死守越三日營陷死之 詔贈副將 予諡武烈以上五公皆 賜祭葬附祀李忠

武祠

評曰曾文正云李忠武重厚少文百戰不挫方謂可躋中興福將之列不意大難未夷長城遽隕惜哉丁太常策三河進止特詳愼嚮從其言安有覆軍之變忠武籌策無遺獨不納此烏呼豈數有不可回者歟

曾忠襄公國荃

曾公國荃字沅圃文正公之弟也少負奇氣倜儻不羣年十六隨父至京師從文正讀書憚其嚴不肯竟學未幾還湘鄉然文正獨奇之嘗賦詩曰辰君平正午君奇屈指老沅真白眉辰君國潢午君國華皆公次兄也道光二十七年以府試第一入縣學旋舉優貢咸豐六年文正困於南昌公在長沙思救兄難募勇三千人援江西克安福進攻吉安戰屢捷明年丁父憂自營奔喪六月廣昌樂安賊牆聚吉安周鳳山等圍吉安敗潰時王公珍病歿樂安劉公騰鴻攻瑞州陳亡士氣沮喪于是湖南巡撫駱公秉章江西巡撫耆齡公奏起公統吉安各軍復振八年築長圍困賊屢擊却外援秋八月望克之論功由同知保知府加道銜江西全省肅清公撤軍還湘獨留吉字二營從文正於建昌假歸長沙俄寇復至江西公復出至撫州合舊部新軍五千八百人公總領之攻賊于景德鎮三戰三捷遂復景德鎮江西再肅清胡公林翼廣求將才調赴黃州由是公屬湖北軍湖北軍三路謀皖公先還湘增募領萬人圍安慶大破賊曾陳玉成於城外十一年四月賊踞集賢關築壘十三公掘長壕困之石牌賊分黨襲屯後力戰六晝夜却之遂攻破城外三石壘及菱湖兩岸壘先後擒斬數萬安慶城外賊營俱盡八月丁巳朔克安慶賊黨殲焉先是京師欽天監瞻天文奏明年某月某時日月合璧五星聯珠國家有非常祥瑞至是果驗說者謂蕩平南服之機肇此公以力戰功記名按察使賞穿黃馬褂公乘勝東下九月薄廬江奪泥汊口神塘河賊壘下無爲克運糧東關決旬之間連克城隘分軍扼守焉躬還安慶與文正商定增募湘勇直擣金陵之策穆宗卽位公以前功加頭品頂戴補浙江按察使擢江蘇布政使時二省淪陷詔在軍督剿同治元年二月公率新軍六千至自

潮循長江北岸進軍水師中流直下南岸破賊荻港舊縣三山夾魯港克繁昌南陵二城北岸破賊望銅城開雍家
缺克巢含山和三城又城岡攻克濡須口西梁山沿江北岸賊壘悉破平之四月公引軍南渡江會水陸各軍下太
平拔金柱關東梁山賊寨復蕪湖沿江南岸賊壘悉破平之公軍獨克大勝關秣陵關三汊河又會水師拔頭關江
心洲浦包洲賊壘皆下五月甲申進屯金陵城外雨花臺自江南大營以兵七萬屯八年卒潰退公軍合水師不滿
二萬文正以兵孤縣未可輕進屢議退軍公策曰諸軍士自應募起義人人以攻金陵爲志今不乘勢薄城下還軍
待寇曠日持久非利也若舍金陵老巢弗攻置將士於閒城浪戰而意怠功必無成逼城而屯亦足以致寇軍勢雖
危顧不可求萬全于是文正許之時金陵城外一壘以百數公駐軍僅南面一隅賊所習見無恆惡意常出大隊
來犯公屢擊却之又值疾疫大作皖南諸軍死亡山積金陵圍師軍士傳染十幕而五不常鬬閏八月疫猶未已將
士方資休息而賊酋李秀成自蘇州糾大衆援金陵號六十萬結二百餘壘環攻十晝夜不休用西洋火器擊我軍
所常輒糜碎部將倪桂中礮殞公而受槍子傷血流交頤裹創巡軍衆心以安浙江賊酋李世賢復來助秀成開地
道用一官軍壘壁隨破隨築公令軍士於營中掘隧迎之手持令不得瞑四旬餘賊又來襲我糧道公一夕築
小壘一之江力戰却之當是時士卒以軍中爲家將帥爲父母不約而親不謀而信故能同心以禦強寇十月
庚申寇座攻公下令開壁大戰俘斬致萬圍乃解世賢遁唐信秀成遁江北公分軍追擊破之又以水師困於蕪湖
分軍守東西梁山文正憂懼猶欲令公乘勝撤圍或議退保蕪湖公曰賊以全力突圍是其故技向公和公正以退
致挫今若蹈一賊且長驅西上何蕪湖之能保况賊烏合無紀律豈可見其衆而自怯至二年春文正視師駐
公營十日見圍屯堅定始無退軍之議公旋擢浙江巡撫仍留金陵四月攻破南門外石壘十會水師克下關草鞋
夾燕子磯九洲洲公軍又攻破長橋印子山上方橋江東橋賊屯分軍克博望鎮上方門高橋門土山方山七藝
橋中和橋賊壘九月克秣陵關僞城於是金陵西南東南隅賊往來之路斷十月攻下城東隅賊壘二十三分軍扼

孝陵衛三年正月攻克鍾山石壘僞號天保城分軍扼太平神策二門城圍乃合賊縱男女七八千人出城以節食又有夷人以輪船載糧夜用三板運至中關濟賊公並擊之由是賊糧亦斷五月攻克龍脖子山陰堅壘僞號地保城遂督軍日夜環攻築高壘瞰城中積濕蒿覆沙土其上以避槍子治地道於下三晝夜隧成實空棺火藥轟陷城垣二十餘丈公親冒矢石衝殺入城時三年六月十六日也於是搜殺數日生縛賊酋李秀成洪仁達於僞天府掘得洪秀全屍焚之賊黨死者十數萬人李秀成者僞號忠王賊中最有名所部皆悍黨秀全見官軍攻急先一月飲藥死大衆皆秀成統之秀成以所乘駿馬與小天王洪福使逸故獲獲時訊供在囚籠中三日書七萬餘言敘其初起及與官軍戰至就擒極詳本欲獻俘因別擒賊目見秀成皆長跪解京路遙恐中變因卽誅之論者謂禽洪福無足重者不得秀成賊不滅也於是

天子褒功錫封一等威毅伯

賞戴雙眼花翎加太子少保乞病歸旋

授山西巡撫不拜五年遷湖北巡撫復引疾歸十三年起用陝西巡撫改東河總督光緒三年復撫山西適三晉奇荒赤地千里公走書告貸各省勸民助賑其言至痛楚先後放賑銀一千三百萬兩米二百餘萬石活饑民六百萬人籌善後蠲役歲省民錢百萬緡晉人德之爲立生祠六年俄人渝盟 詔赴山海關防海寇俄人憚公威不敢近和議遂成擢陝甘總督未赴散兵歸里八年權兩廣總督內 召攝禮部尙書十年授兩江總督 上親政加

太子太保初至江南值法國啓釁公在吳淞江陰設立礮臺布置嚴密彼族不敢發焉思逞江防以固迨鄭州決口力籌河防濬深張福口引河以資宣洩堅築裏下河長圩爲捍衛又賑蘇皖水災兼顧浙鄰籌助 畿輔賑一年之中集款百萬上分 宵旰憂勤遺言以外國雖和好不可一日不嚴江海之防憂深慮遠忠愛之心溢于言表以光

緒十六年十月二日薨於位年六十有七遺疏入

天子震悼追贈太傅

賞銀三千兩治喪

賜祭一壇

予諡忠襄

詔入祀京師昭忠賢祠並于湖南原籍江南省城建立專祠凡立功省分皆準建祠子二紀瑞紀官

早卒孫三廣漢特用主事襲爵廣江附生

賞舉人廣河員外郎曾孫三兆龍兆祥蔭椿俟及歲時由吏部帶領引